

禮記質疑

禮記質疑卷二十四

思賢講舍

湘陰郭嵩燾伯琛著

祭義

是故君子合諸天道春禘秋嘗

鄭注春禘夏殷禮也周以禘爲殷祭更名春祭曰祠嵩燾案周禮祠禴嘗烝四者之祭名見於爾雅公羊傳義著於毛詩傳王制乃云春祭曰礒夏祭曰禘凡戴記舉祭之名但言禘嘗無及禴祠者郊特牲春禘秋嘗正與此同仲尼燕居言嘗禘之禮中庸言嘗禘之義凡云禘者皆謂時祭春夏陽盛以饗禮行之秋冬陰盛以食禮行之禘之禮盛於礒嘗之禮備於烝兼禘嘗爲言而云春秋者略辭也祭統之言備矣其曰

禘陽義也嘗烝陰義也禘者陽之盛也嘗者陰之盛也凡禮經之言禘嘗者其義畢具於此鄭云周以禘爲殷祭更名春祭曰祠義或有然然禘本夏祭名禘祫禘嘗二者之義不妨互存鄭注王制云夏殷祭名注祭統云謂夏殷時禮注郊特牲云此禘當爲禴字之誤竝失之泥

又案戴記言禘言祫有二義喪服小記大傳禘其祖之所自出大禘也餘皆時祭于祫及其高祖大祫也餘亦時祭曾子問祫祭於祖祝迎四廟之主卽王制所謂祫禘祫嘗祫烝也說文引周禮曰五歲一禘三歲一祫而公羊傳云五年而再殷祭於是有一歲一禘之說許慎五經異義古春秋左氏說日祭月祀時享歲祫終禘於是有一歲一祫而禘惟一祭之

說以春秋之義揆之閔公二年吉禘於莊公范注穀梁傳云三年喪畢致新主於廟因是大祭謂之禘杜注左傳云大祭以審昭穆是以終喪合食太祖遷主入祧春秋謂之禘五經異義所謂終禘也僖八年禘於太廟用致夫人左傳謂致哀姜穀梁傳謂致成風竝同此義文二年大事於太廟躋僖公公羊穀梁竝以爲大禘而云毀廟之主陳於太祖未毀廟之主皆升合祭於太祖公羊傳於此竝云五年而再殷祭是謂大禘也其實致僖公之主於廟當亦爲終禘之祭曾子問天子崩諸侯薨祝奉羣廟之主藏於太祖廟卒哭成事而後反於廟反於廟以待祔也王制喪三年不祭終喪遷主入祧而審昭穆之序是以謂之大事春秋之書禘自當別爲一義其

後宣公八年有事於太廟昭公十五年有事於武宮左傳亦云禘於武宮則時祭也明堂位所謂武公之廟武世室也又案定公八年左傳順祀先公而祈焉辛卯禘於僖公亦時祭也鄭氏魯禮禘祫志竝以爲殷祭而引明堂位魯王禮也謂可以準況周禮恐非春秋之旨

案明堂位季夏六月以禘禮祀周公於太廟魯或仍夏禘

之名舉行盛禮而因以爲終喪遷主之祭春秋書吉禘於莊公明終喪而始行吉祭因奉莊公之主於廟也魯雖僭禘而自爲諸侯之禮其云太廟猶周公之廟也未嘗禘其所出而祀文王則亦時祭之事也

詩小序雖禘太祖也

長發大禘也鄭箋太祖謂文王元鳥祀高宗也鄭箋祀當爲祫禘者禘其祖所出何以云禘文王祫者合食太祖殷周禮同也何以云祫高宗禘自有時禘大禘之分春秋之書禘諸侯禮也與大禘別先儒之說多未分明

祭之日入室僂然必有見乎其位周旋出戶肅然必有聞乎其容聲出戶而聽愾然必有聞乎其歎息之聲

鄭注無尸者闔戶若食間則有出戶而聽之孔疏士虞禮無孫行爲尸則祝闔戶牖如正祭尸一食九飯之頃嵩齋案士虞記無尸則禮及薦饌皆如初主人哭出復位祝闔戶牖男女拾踊三如食間祝升止哭聲三啟戶主人入蓋以當尸入初獻亞獻之節於時主人哭拾踊安得出戶而聽虞祭喪禮引以釋此故非宜也特牲禮祝筵几於室中東面主人及祝升祝先入主人從西面於戶內少牢禮司宮筵於奧祝設几於筵上主人升自阼階祝先入南面主人從戶內西面此所謂入室也時主位西主人西面面主如見所祭者之在其位

也故曰有見乎其位特牲禮主人降佐食舉牲鼎舉魚腊臠  
佐食升所俎主人升入復位俎入設於豆東此所謂周旋出  
戶也周旋謂升鼎及俎及設敦鉶啟會之事至是而有酌奠  
贊饗之儀故曰有聞其容聲特牲少牢禮主人降立於阼階  
東於時祝出迎尸主人出立阼階西面屏息而若有所聽酌  
奠之事於是畢矣故曰有聞其歎息之聲三者皆在迎尸前  
郊特牲所謂直祭祝於主也尸入而有獻有酢有酬有醕以  
饋食禮行之不能專致其思矣鄭引士虞記之文豈謂有尸  
者遂無出戶而聽之事恐不然也

惟聖人爲能饗帝孝子爲能饗親饗者鄉也鄉之然後能饗焉  
是故孝子臨尸而不作

鄭注能饗帝能饗親謂祭之能使之饗也中心鄉之乃能使  
其祭見饗也色不和曰忤高齋案馬融論語注忤慙也孟子  
仰不愧於天俯不忤於人凡有愧歉於心之謂忤聖人之能  
饗帝孝子之能饗親非徒致敬於所饗而已所以願謨天之  
明命而敬守其親之遺體息息與相依焉常若天之鑒臨其  
上與親之詔示其前所謂鄉者常目在之心專志壹而無敢  
違越也尸之與親一氣相感而於吾尤習動靜語默稍有不  
合臨祭對之而必多慙沮孝子臨尸不忤所以爲鄉親之本  
也義疏謂此節緊承上終身弗辱辱者防其身之或玷不忤  
者信其心之無枉也思弗辱則能不忤矣義疏恐未盡

君牽牲夫人奠盞君獻尸夫人薦豆卿大夫相君命婦相夫人



鄭注奠盎設盎齊之奠也此時君牽牲將薦毛血君獻尸而夫人薦豆謂繹日也饋尸主人獻尸主婦自東房薦韭菹醢蒿蕞案禮器君親牽牲大夫贊幣以從君親制祭夫人薦盎君親割牲夫人薦酒明堂位君肉袒迎牲於門夫人薦豆籩與此文互有繁減而皆約畧言之禮運元酒在室醴醖在戶粢醖在堂澄酒在下鄭注醖同盎澄同沈周禮之五齊同設於宗廟而獻用盎齊司尊彝鬱齊獻酌醴齊縮酌盎齊況酌郊特牲申其義云縮酌用茅明酌也醖酒況於清汁獻況於醖酒是裸鬯亦況以盎齊鄭注司尊彝朝踐酌醴后於是薦朝事之豆籩后酌亞獻內宗薦加豆籩后於是薦饋食之豆籩而郊特牲云既灌然後迎牲夫人不得有奠盎之事祭統

君執紼卿大夫序從士執芻宗婦執盞從夫人薦況水君執鸞刀羞嗜夫人薦豆與此所記略同而義較明顯蓋君出迎牲宗婦注盞齊於尊而夫人薦況以待朝事之奠也凡祭獻主婦先陳設君獻尸夫人薦豆朝踐饋食及醕尸皆然周禮醢人有朝食之豆饋食之豆加豆羞豆籩人亦然鄭氏司尊彝注極詳而於此據特牲少牢禮主婦薦豆在迎尸前因引有司徹禮爲言而謂之饋尸則亦不知饋食士大夫之禮無裸無朝踐故亦無迎牲之文未可據以釋此經也

案庾蔚之禮記略解

此奠盞在迎牲之時於事太早奠盞爲洗牲禮無奠盞洗牲之文庾氏亦未達主婦陳設之義耳

如見親之所愛如欲色然

鄭注如欲色然以時人於色厚假以喻之嵩齋案疏引王肅

云欲色如欲見父母之顏色則亦疑注比父母於女色於文有未安者上文思其所樂思其所嗜所愛卽所嗜也如見其色之甘而食之卽所謂鄉之然後能饗也王肅云欲見父母之顏色於義反隔陳氏集說想像親生平所愛之物如見親有欲之之色也較王說爲勝

反饋樂成薦其薦俎序其禮樂備其百官君子致其濟濟漆漆夫何恍惚之有乎

鄭注天子諸侯之祭或從血腥始至反饋是進孰也孔疏皇氏云初祭尸入於室後出在堂門戶更反入而設饋故云反饋樂成謂設饌進孰合樂成畢君子謂助祭之人於此特致其濟濟漆漆賓客之事尚肅樂犧牲禮賓三獻有薦俎尸卒饗

酢酌獻祝及佐食洗爵酌致主人主婦更爵酢主人於是有  
獻賓酬賓之禮有司徹禮賓三獻主人酌獻賓西階上司士  
設俎於豆北獻兄弟私人阼階上獻內賓於房中竝有薦香  
尸作三獻之爵司士執俎以升於是有旅酬之禮似所謂反  
饋者饋食之禮終而後獻祝獻佐食獻賓皆有薦俎薦其薦  
俎兼尸俎祝俎阼俎主婦俎佐食俎賓俎言之所以序禮樂  
而備百官以昭饋獻之盛也案下重言薦其薦俎序其禮樂  
備其百官自據奠饗時言之與  
此事同而鄉飲酒禮獻賓獻介及眾賓畢然後樂作而行旅  
酬鄉射禮獻賓及眾賓畢然後樂作而立司正比耦大射禮  
獻賓獻卿獻大夫畢然後樂作而羞庶羞獻士而行無算爵  
曰樂成者卽樂正之告正歌備也在禮無設饌進孰合樂之

文賓祭之禮同也經意謂饋食禮畢獻賓獻兄弟而行旅酬乃致其濟濟漆漆之容濟濟漆漆者充周流動威儀眾盛非恍惚以交神明之義疏以君子專屬助祭者亦非也

其立之也敬以詘其進之也敬以愉其薦之也敬以欲退而立如將受命已徹而退敬齊之色不絕於面

鄭注詘充詘形容喜貌也進之謂進血腥也薦之謂進孰也欲婉順貌孔疏其立之也言孝子尸前而立也嵩齋案立者祭前特牲禮主人服如初立於門外少牢禮主人朝服卽位廟門外將祭卽位阼階東此所謂立之也詘者卑屈下文容貌必溫身必詘與此同義鄭訓充詘非也

案鄭注儒行隅獲困迫失志之貌充

詘歡喜失節之貌隅獲充詘皆兼兩義鄭以歡喜失節釋之極允此訓充詘形容喜貌亦與儒行注不合進者始

入時特性禮主人及祝升祝先入主人從西面於戶內少牢  
禮主人盥升自阼階祝先入主人從戶內西面此所謂進之  
也薦者進孰時特性禮主婦薦兩豆俎入設於豆東設兩敦  
黍稷於俎南兩銅筆設於豆南祝洗酌奠佐食啟會少牢禮  
薦四豆四敦佐食上利執羊俎下利執豕俎司士三人執魚  
腊膚俎祝酌奠佐食啟會蓋二以重設於敦南此所謂薦之  
也欲者欲其歆饗之退而立謂迎尸時特牲少牢禮祝迎尸  
於門外主人降立於阼階東於時事尸之禮方始故曰如親  
受命已徹而退謂尸出而餽事畢特性禮祝告利成降出主  
人降佐食徹阼俎堂下俎畢出少牢禮饗者三人興出上簋  
止主人受爵坐奠爵上簋興出主人送乃退敬齊之色不絕

於面謂祭畢然也注意疑未合

是故至孝近乎王至弟近乎霸至孝近乎王雖天子必有父至弟近乎霸雖諸侯必有兄

鄭注天子有所父事諸侯有所兄事謂若三老五更也天子衰諸侯興故曰霸孔疏雖天子之尊必有事之如父者謂養三老也雖諸侯之貴必有事之如兄者謂養五更也嵩齋案此節文義推原人心自然之愛敬以爲治天下之本由一家達之天下其理莫能外也上言先王所以治天下者五卽橫渠西銘之旨所從出項氏安世云事親爲仁敬長爲義王者以仁覆天下故至孝近之君之道主乎仁也霸者以義尊王故至弟近之臣之道主乎敬也孟子云親親仁也敬長義也

仁之實事親是也義之實從兄是也皆以孝弟盡仁義之用  
舉王霸爲言者明孝弟之用也項氏此訓略爲近之下文明  
言立愛自親始立敬自長始愛親以教民睦而民貴有親敬  
長以教民順而民貴用命有親者王者之事也故曰至孝近  
乎王用命者霸者之事也故曰至弟近乎霸鄭引三老五更  
明父事兄事之義已非經旨疏因以爲父事三老兄事五更  
而謂天子尊故父事屬之諸侯卑故兄事屬之失之邈遠矣  
祭之日君牽牲穆答君卿大夫序從

鄭注穆子姓也孔疏姓生也是昭穆所生謂子孫言穆者文不  
備子姓對君共牽牲卿大夫佐幣士奉芻依次從君嵩燹案  
特牲禮嗣舉奠鄭注嗣主人將爲後者其舉奠在獻賓獻兄



弟之後當與兄弟弟子爲旅酬無及牽牲對君之文王氏章句穆謂尸也據主祭者而言孝子爲昭孫爲尸則穆也君牽牲入自廟門尸在堂南面臨之據郊特牲旣灌然後迎牲其時尸先入而待割牲制祭經言答君與郊特牲言坐尸於堂同爲一事蓋牽牲在庭而尸在堂正兩相向故曰答君周禮大宗伯帥執事省牲饌詔相王之大禮小宗伯毛六牲辨其名物大祭祀省牲肆師大祭祀展犧牲祝凡大肆隋鸞逆牲鄭注隋鸞謂薦血也少牢禮司馬封羊司士擊豕鄭注小宗伯引鄭司農云司徒主牛司馬主馬及羊司空主豕凡大宗伯之屬皆卿小宗伯中大夫肆師大祝下大夫皆有事於牽牲者故曰序從疏據禮器大夫贊幣從君爲言亦非也

卿大夫袒而毛牛尚耳

鄭注以耳毛爲上也孔疏卿大夫袒取毛牛薦之耳主聽故以耳毛欲使神聽之嵩燹案郊特牲毛血告幽全之物也貴純也禮運薦其血毛血以告幽毛以告全此云尚耳耳毛純則餘必純矣薦以耳毛亦取其柔鄭注雜記𧈧謂割牲以聲先滅耳旁毛薦之耳聽聲者告神欲其聽之疏於此據以爲說望文生義恐非經旨

夏后氏祭其闇殷人祭其陽周人祭日以朝及闇

鄭注闇昏時也陽讀爲日雨曰暘之暘謂日中時也朝日出時也夏后氏大事以昏殷人大事以日中周人大事以日出亦謂此郊祭也以朝及闇謂終日有事嵩燹案檀弓明言斂

用昏斂用日中斂用日出未可據爲郊祭之證少牢禮請祭  
期曰旦明行事尙書正月朔旦受命于神宗召誥一篇言丁  
未王朝步自周戊申太保朝至于洛乙卯周公朝至于洛甲  
子周公乃朝用書似古人行事皆以朝劉氏敞云周人祭以  
朝及闇周尙赤先日欲出之初猶逮及闇則可行祭事矣似  
爲近之闇者未明陽者日已出以朝及闇猶言明晦之間所  
謂昧爽是也朝則已曙及闇則日猶未出周之郊豈必窮日  
之力哉尙書大傳夏以平旦爲朔殷以雞鳴爲朔周以夜半  
爲朔朔以三正爲候也檀弓夏后氏尙黑殷人尙白周人尙  
赤赤者日初出郊祭之時以所尙之色爲候也

案崔靈恩三  
禮義宗陽氣

始施萬物動於黃泉之下微而未著其色赤  
故以三微爲義以朝及闇一日之陽微動也

天下之禮致反始也致鬼神也致和用也致義也致讓也

鄭注因祭之義泛說禮也致之言至也至於反始謂報天之屬也至於鬼神謂祭宗廟之屬也至於和用謂治民之事以足用也嵩齋案此五者承祭義言之以總結上文反始者萬物本乎天人本乎祖德小者推一身之從出反之祖以報之德大者又推萬物之從生而反之天以報之故曰厚本鬼神者見聞之所不能及性情嗜欲之所不可知而合氣於漠積誠以求通焉故曰尊上和用者備物致用序其禮樂備其百官使人孝弟之情愛敬之實油然而生於其心故曰以立民極致者推究其極之意致反始以達其心之誠主在己者言致鬼神以昭天地祖宗之德主所祭者言致和用以見物產

之豐主在物者言三者體也致義著其肅而獻饗之各有其節致讓著其和而酬酢之交致其情二者用也故曰合此五者以治天下之禮語意正當微會

氣也者神之盛也魄也者鬼之盛也合鬼與神教之至也

鄭注氣謂嘯吸出入者也耳目之聰明爲魄合鬼與神而祭之聖人之教致之也嵩齋案說文魂陽氣也魄陰神也謂之陰神者形體中之性識白虎通魄者迫迫然著於人也關尹子因意有魄因魄有精朱子云魄主藏受是也鄭以耳目之聰明爲魄其實聰明卽魂所以效其聰明之用者魄也左氏傳人生始化曰魄既生魄陽曰魂魄具而後魂有以效其用是以魂有聚散而魄無聚散氣散魂游魄斯泯焉故曰魂升

魄降升者無而仍有降者有而固無也氣魄離而後鬼神之  
名立聖人制爲祭祀之禮以迎氣而返之於魄致魄而通之  
於氣卽其平日居處笑語嗜欲而以誠合之故曰合鬼與神  
教之至也教卽厚本尊上以立民極之意謂聖人設教致鬼  
神合而祭之恐未盡

其氣發揚於上爲昭明焄蒿悽愴此百物之精也神之著也

鄭注焄謂香臭也蒿謂氣蒸出貌也蒿或謂薦上言眾生此  
言百物明其與人同也不如人貴耳孔疏百物之氣或香或  
臭烝而上出其氣蒿然人聞之其情有悽有愴人與百物其  
同但人情識爲多人氣發揚於上爲昭明是人神之顯著故  
特謂之神也蒿焄案萬物各受天之氣以生其死也氣散而

返於無而人於其間陟降恍惚若猶有氣之存焉不與物同其漸滅是之謂神神者氣之至精而不散者也故曰百物之精百物之精與上眾生對文兼人物言之曲禮羽鳥曰降四足曰漬鳥之上飛者其死亦必麗於土蓋氣屬天而形屬地氣盡則形必反歸於地故曰鬼者歸也此之謂鬼專主人言謂人所以爲鬼與物之歸於土同也而其氣之發揚於上獨有其至精者耿耿然相爲照臨焉是以謂之百物之精昭明焄蒿悽愴三者皆以狀其氣之盛昭明者氣之洋溢然也焄蒿者氣之組網然也悽愴者氣之肅穆然也昭明如或見之焄蒿如或聞之悽愴如或感之鄭於此兼人物言誤疏謂焄蒿悽愴百物所同昭明人所獨亦於經旨未合

明命鬼神以爲黔首則

鄭注明命猶尊名也尊極於鬼神不可復加也孔疏聖人因人與物死之精靈遂製造爲尊極之稱尊而名之爲鬼神亦兼山川五祀百物之屬故禮運列於鬼神注云謂祖廟山川五祀樂記幽則有鬼神注云助天地成物者嵩雩案此論鬼神之義專主宗廟之祭言之所以教民反始也明命鬼神者示人之死必不與眾生百物同其泯滅而鬼與神之合效其精爽存乎人子之心之感而通之而仁孝之心自動於不容已天地百神之祀以是推而行之而皆準矣疏兼人物言以通之山川五祀似非經旨

二端既立報以二禮建設朝事燔燎羶薌見以蕭光以報氣也



此教眾反始也薦黍稷羞肝肺首心見間以俛無加以鬱鬯以報魄也

鄭注二禮謂朝事與薦黍稷也朝事謂薦血腥時也薦黍稷所謂饋食也蒿蕕案周禮司尊彝有裸獻有朝踐有饋獻而儀禮特牲少牢惟詳饋食之禮其初酌奠致祝辭鄭注謂之厭祭郊特牲云直祭祝於主者是也皆先薦豆舉鼎升俎設敦黍稷鉶苴其禮甚備惟祝酌奠無獻受之儀而已郊特牲以灌用鬯臭爲臭陰蕭合黍稷爲臭陽而云既奠然後炳蕭故以爲殷人先求諸陽周人先求諸陰復申其義曰祭黍稷加肺報陰也取脾膋燔燎升首報陽也似薦黍稷在炳蕭之前

案疏援既奠炳蕭之文遂據爲饋食之炳蕭而云一祭再炳蕭甚誤鄭注郊特牲既奠亦云

饋孰時則是饋食後乃炳蕭與此經所注正相岐左特牲少牢禮並於初獻之始取黍稷肺授尸薦黍稷者事尸之始事也司尊彝凡四時之間祀其朝踐用兩大尊大尊正此所謂挾甒而連鬯鬯爲文其必非饋獻之禮明矣經明言建設朝事報氣報魄二者皆所設朝踐之事也鄭注籩人其其籩薦羞之實云未飲未食曰薦朝踐之薦黍稷猶求神之義也饋食以後以人道事之無所爲報氣報魄矣天子諸侯之祭禮不詳周禮敘朝踐於裸獻之後故言禮者通朝踐爲事尸之文其實薦血腥燔燎制祭致臭以通之於神不當用以事尸而禮經錯舉爲文無從推見其義要之此經以建設朝事胾下二義固未宜以饋食爲言也

案郊特牲燔燎升首此云薦黍稷羞肝肺首心特牲饋食

禮凡獻皆取肺取肝授尸禮經錯舉爲文正未宜執一義以概之

古者天子諸侯必有養獸之官及歲時齋戒沐浴而躬朝之犧牷祭牲必於是取之敬之至也君召牛納而視之擇其毛而卜之吉然後養之君皮弁素積朔月月半君巡牲所以致力孝之至也

鄭注歲時齋戒沐浴而躬朝之謂將祭祀卜牲君朔月月半巡視之君召牛納而視之更本擇牲意孔疏歲時謂朔月月半君巡牲者卽前言歲時朝之也高齋案周禮牛人掌養國之公牛凡祭祀其牛以授職人芻之牧人掌牧六牲其祭祀之牲牷凡祭祀其其犧牷以授充人繫之充人掌繫祭祀之牲牷祀五帝則繫於牢芻之三月享先王亦如之是牧人掌

養祭祀之牲歲時躬朝謂祭前三月擇牲於牧人而卜之躬朝卽所謂納牛而視之也吉然後養之又養之充人者也朔月月半之巡牲又就充人而省之於牢如春秋鼯鼠食郊牛角及以傷而改卜牛巡牲者懼其有傷也躬朝以擇牲既卜而又數巡視之自屬兩事注意似未分明

夫人曰此所以爲君服與遂副禕而受之因少牢以禮之古之獻繭者其率用此與

鄭注副禕王后之服而云夫人容二王之後其率用此與問者之辭蒿蕪案內司服掌王后之六服四曰鞠衣鄭注黃桑服也月令三月薦鞠衣于先帝告桑事似后親桑服鞠衣玉藻世婦命於奠繭獻繭而內命婦因以受命焉其禮宜加隆

曰副禕者極言服之盛也經原通天子諸侯爲言

案祭統君衾冕立於

阼夫人副禕立於房中亦兼天子諸侯爲文以明服之盛而已周禮后亦多兼夫人爲稱王后獻繭不詳

於禮經鄭注內司服禕衣揄狄闕狄三者皆祭服恐亦未必

遽以享先王之禕衣臨之繭成而掌之典絲凡內宮人之服

及王賜予皆取資於是初獻繭時不能別之爲君服也夫人

副禕而受之爲君服之在其中也故鄭重而言之其禮之用

享非重繭也重其爲祭祀之服也蓋自古爲然記者所以發

明禮意之辭謂重其事必備其儀也

孝有三大孝尊親其次弗辱其下能養

孔疏大孝尊親聖人爲天子者也尊親嚴父配天也其次弗

辱謂賢人爲諸侯及卿大夫士其下能養謂庶人也嵩齋案

尊親者繼志述事使其德與名被於天下而推以爲父母之功而人尊之語其極則聖人也弗辱者出言舉足不敢忘父母所謂不虧其體不辱其先者也能養竭其力以事父母者也尊親弗辱不待言養能養者盡此而已此言孝道之廣視所以自成其身者以爲之程故曰仁者仁此者也義者宜此者也豈能以貴賤爲之等哉

博施備物可謂不匱矣

孔疏博施則德教加於百姓刑於四海備物謂四海之內各以其職來助祭蒿蕞案備物卽孟子萬物皆備於我之意博施者推一己之仁於天下備物者涵天下之物於一心仁者孝之施也能孝於親必能仁於物苟一物之不慊於其心則

仁之體有虧而孝亦有所不能充爲其心之仁愛猶有歉也  
故曰孝者仁之本也仁能備物斯之謂不匱矣疏意失之  
父母旣沒必求仁者之粟以祀之此之謂禮終

鄭注必求仁者之粟喻貧困猶不取惡人物以事亡親也嵩  
齋案孟子惟士無田則亦不祭士有祿而後祭然苟非其道  
則薦而不祭亦自盡其誠焉而已危邦不入亂邦不居懼辱  
親也必求仁者之粟卽孟子又惡不由其道之意窮究物之  
由來而有不適於其心焉則不可以爲養雖沒而假於物以  
饗之不敢或違也如是之謂禮鄭注云云意是而語非也  
忿言不反於身

鄭注忿怒之言當由其直直則人服不敢以忿言來也嵩齋

案鄭氏剛嚴嫉惡故有是言於經義非也忿言之加於人未有不反報之者是以君子之無忿言非徒以恕人也所以內自慙焉而恐乖戾之氣之或留於吾身也至反而有忿言之及其身其必由吾之德不足以容之而所辱多矣故夫顏子之犯有弗校焉孟子之橫逆有可以自反焉忿言之反於身則亦自取之而已是以君子懼之也

有戍氏貴德而尙齒夏后氏貴爵而尙齒殷人貴富而尙齒周人貴親而尙齒

鄭注貴謂燕賜有加於諸臣也舜時多仁聖有德後德則在小官嵩燕案鄭意以貴爵貴富與貴德不相爲類故竟謂戍氏貴德不以爵論不知貴德卽貴爵也九官十二牧之命皆



所以貴德也夏殷貴功爵與富功之積也殷道尊賢若伊尹  
伊陟臣扈巫賢甘盤傳說膠鬲之屬皆非同姓至於周之興  
子姓之國存者微箕以外無間焉周道親親而夏殷之制始  
一變武王克殷封同姓之國四十有八異姓之國十有六所  
貴者親也猶之貴爵也沿至於今不廢周道之仁也疏分四  
代優劣殆尤失之

### 天子設四學

鄭注四學謂周四郊之虞庠也高齋案周立四代之學詳見  
文王世子其云禮在瞽宗書在上庠上庠亦四學之一與虞  
庠之爲郊學者同以庠爲名而學自別猶虞氏上庠下庠之  
分也大司樂凡有德者有道者使教焉死則以爲樂祖祭於

蔣宗蔣宗殷學也於周爲西學學禮於西學習樂於東序禮陰而樂陽也故西學以祀先賢而東序以養老學禮因是有東學西學南學北學之名鄭注文王世子引董仲舒曰五帝名大學曰成均則虞庠近是也注王制西序虞庠小學也西序在西郊周立小學於西郊又以小學在公宮南大學在郊之文與虞庠小學參差而據以爲殷制其注祀先賢西學亦云周小學也遂使禮經之言學者一無可通此又因四學而爲四郊虞庠之論益見其惑矣

詳見王制及文王世子

八十九十者東行西行者弗敢過西行東行者弗敢過欲育政者君就之可也

鄭注弗敢過者謂道經之則見之嵩燾案下文欲言政者君

就之則不言政固不就見弗敢過謂讓之於途不敢疾行先之雖東西異道天子自致其尊崇之禮徐行以俟老者先焉敬之至也疏云至八十九十閭里之旁不敢過越而去於文似屬添設

壹命齒於鄉里再命齒於族三命不齒族有七十者弗敢先

鄭注此謂鄉射飲酒時也齒者謂以年次立若坐也三命列國之卿也不復齒席之於賓東不敢先族之七十者謂既一人舉觶乃入也雖非族亦然承齒乎族故言族耳嵩燾案鄉飲酒禮就先生謀賓介鄭注先生鄉中致仕者賓介處士似鄉飲酒合鄉之士大夫以觀禮而賓介皆不及爵故鄉飲酒記云樂作大夫不入既旅士不入是鄉飲賓介惟賢不及大

夫士似此所記與射飲之禮無涉黨正以禮屬民而飲酒於序以正齒位一命齒於鄉里再命齒於父族三命不齒則通鄉人大夫士而飲之兼正其齒與位正此類也齒與位竝尊黨正以時正之示民不敢踰其平時與鄉族爲齒亦猶是也七十上壽禮有優焉族有七十者弗敢先於正齒位之中仍致其敬老之意所以廣孝也鄉飲禮賓若有遵者一人舉觴乃入則凡鄉人之與飲者皆弗敢先焉又不獨以施之族有七十者而已

宿者皆出其立卑靜以正如將弗見然

鄭注宿者皆出謂賓助祭者嵩燾案特牲禮宗人告事畢賓出主人送於門外再拜無反立之文疑尸將出主人出立於

戶外西南佐食徹尸俎既餽祝徹胙俎其立卑靜以正當據此時言之凡祭宿尸宿賓祝與佐食皆賓也經云宿者皆出兼謂尸及祝佐食之屬

禮記質疑卷二十五

思賢講舍

湘陰郭嵩燾伯琛著

祭統

忠臣以事其君孝子以事其親其本一也上則順於鬼神外則順於君長內則以孝於親如此之謂備唯賢者能備能備然後能祭

鄭注其本一者言忠孝俱由順出也嵩燾案此推言無所不順之謂備由其誠敬積之於平日忠孝之實幽明之理惟順以相感召順者誠敬之至也順於鬼神所以仰不愧天順於君長所以俯不忤人推仁孝之心以事君以質之鬼神終身在誠敬之中而無敢失墜故曰百順未能慊然於平日而取

給臨祭一日之順未有能順者也注意似以祭祀之順通諸事君事親恐非經旨

致其誠信與其忠敬奉之以物道之以禮安之以樂參之以時明薦之而已矣不求其爲此孝子之心也

鄭注爲謂福祐爲己之報嵩燾案少牢禮報曰主人受祭之福禮運祝以孝告嘏以慈告蓋通鬼神之意於人人以致報鬼神鬼神亦以致報於人樂記所謂禮必有報是也孝子之祭其親而以求福非也不求其爲如檀弓云惟祭祀之禮主人白盡焉耳豈知神之所饗亦以主人有齊敬之心也郊特牲云主人自致其敬盡其嘉而無與讓也謂自盡其誠孝之心而不必求其所以然正申明上文心忱而奉之以禮意誠

信忠敬心忱之實也物者鼎俎簋豆之數禮者三獻九獻之文樂者宮縣軒縣之等時者春祈秋嘗之宜皆所謂奉之以禮也心忱而奉之以禮祭義備矣其所以然之故孝子不求知也不必承上受福爲言

孝者畜也順於道不逆於倫是之謂畜

鄭注畜謂順於德教孔疏孝子順於德教不逆倫理可以畜養其親嵩熹案說文畜田畜也蓄積也云田畜者謂力田之蓄積也說文引淮南子玄田曰畜徐鍇云畜養起於微也是畜字本訓但爲蓄積之義通於畜養又假借爲好字孟子畜君者好君也說苑民善之則畜也不善則讎也莊子外篇畜畜然仁又通爲容畜之義鄭注周禮庖人始養之曰畜卽徐



注說文所本而義實各別孝之爲畜正謂蓄積之久始終保之畜固不訓養也疏云畜養其親恐誤

昆蟲之異草木之實陰陽之物備矣

鄭注昆蟲謂溫生寒死之蟲也內則可食之物有蜩范蒿蕪案昆蟲草木屬之陰陽者昆蟲化生草木之實生植以時注以溫生寒死釋陰陽之義至精而專以屬之昆蟲舉蜩范爲言又似稍泥周禮醢人有羸醢有蜃醢蜚醢皆物之化生者鄭注陸產之醢云蜚蜚之屬其實陸產當爲兔麋以供籩豆之實不入牢俎故曰小昆蟲之異正鄭注所云蜚蜚之屬也案周禮醢人祭祀共麋羸蜚以投醢人注蜚蜚子爾雅蜚蜚蜚注蜚子未有起者並引國語蟲舍蜚蜚爲說是正見陰陽生化之機不必專舉蜚內則蜩范不登祭品似未宜泛及范以時生滅者言之

王后蠶於北郊以共純服

鄭注純服亦冕服也互言之爾純以見緇色冕以著祭服嵩  
齋案玉藻純組紃注云純當爲緇古文緇或作糸旁才周禮  
媒氏純帛注云純實緇字也古猶以才爲聲論語今也純注  
云純讀爲緇是鄭意純紃字通據周禮考工記五入爲緇七  
入爲緇注云元在緇緇之間其六入者與元緇二者色異緇  
衣元端朝服也元冕祭服也鄭注周禮司服元者衣無文裳  
刺黻而已凡冕服皆元衣纁裳士冠禮爵弁服纁裳純衣鄭  
注純衣絲衣也餘衣皆用布惟冕與爵弁服用絲司服天子  
六冕皆用以祭此云純服通天子六冕言之云冕服通諸侯  
五冕言之說文純絲也周頌絲衣傳云祭服也天子六冕絲

服同故統言衣諸侯五冕章數各別故析言冕王后其蠶正  
備絲服之用冕服元衣與緇衣別鄭謂純以見緇色者非也  
君致齊於外夫人致齊於內

孔疏外謂君之路寢內謂夫人正寢嵩燹案祭義致齊於內  
散齊於外外謂路寢燕朝之地內謂廟中內者隱而外者顯  
也此云君致齊於外夫人致齊於內內謂宮寢外謂廟中內  
者入而外者出也疏意似與祭義忤

及迎牲君執紼卿大夫從士執芻宗婦執盎從夫人薦浼水君  
執鸞刀羞濟夫人薦豆

鄭注浼盎齊也盎齊浼酌凡尊有明水因兼云水爾濟濟肺  
祭肺之屬也孔疏濟有二時一是朝踐之時取肝以膋貫之

入室燎於鑪炭出薦之主前二謂饋孰之時君以鸞刀割制所羞臠肺橫切之使不絕亦奠於俎尸竝嗜之嵩燾案體器君制祭夫人薦盎祭義君牽牲夫人奠盎與此凡三言夫人薦盎一次之制祭後兩次之迎牲後割牲制祭竝在朝踐前夫人不應有薦盎之事特牲禮主人及祝升祝先入主人從西面於戶內主婦盥於房中薦兩豆少牢禮主人戶內西面主婦薦自東房四豆凡祭主婦先設豆此經敘薦泔水於薦豆之前郊特牲云醖酒泔於清鄭注醖酒盎齊也夫人薦泔水卽司尊彝所謂盎齊泔酌盎泔清酒於盎齊以待奠竝始祭陳設然耳及迎牲三字總攝此二節特牲禮舉肺脊舉幹取肝羞燔尸竝嗜之少牢禮舉牢幹舉牢肩取肝尸竝嗜之

經云羞嗜謂割牲時分別以授尸不專爲舉肺言也疏兼肝肺爲說而引燔肝制祭之文以謂嗜有二時燔肝制祭祭義所謂燔燎羶薌間以蕭光以報氣也安得以羞嗜言之疏於此失之尤遠

舞莫重於武宿夜

鄭注武宿夜武曲名也孔疏皇氏曰師說書傳云武王伐紂至於商郊停止宿夜士卒皆歡樂以待旦因名焉熊氏曰宿夜卽大武之樂也高齋按獻始於裸樂始於升歌則武宿夜者亦舞之始也樂記備戒之已久故有再始著往之文酌之詩曰於鑠王師遵養時晦追敘伐商之始遲留審慎故凡舞以樂奏一終爲一成而舞之始旣備戒而又遲之久謂之武

宿夜者樂奏之宿留停緩以引其聲者也詩小序維清奏象舞也武奏大武也舞有文武之節六成九變之容樂記云詩言其志歌詠其聲舞動其容是以文采節奏爲聲之飾舞者所以飾樂也疑周頌酌桓賚般皆以飾舞而爲之節不能僅以維清一詩概象舞之變大武一詩盡武舞終始之容也皇氏據尙書大傳停止宿夜之文以證武宿夜之爲曲名恐屬傳會

是故尸謏君與卿四人餽君起大夫六人餽臣餽君之餘也大夫起士八人餽賤餽貴之餘也士起各執其具以出陳於堂下百官進徹之下餽上之餘也

鄭注進當爲餽聲之誤也百官謂有事於君祭者也嵩齋案

特牲禮兩簋曰上簋曰次簋少牢禮四人簋曰上簋曰次簋  
鄭注古文簠皆作餽士餽者舉奠及長兄弟大夫餽者上佐  
食下佐食賓長二人凡祭獻賓酬賓以至旅酬無算爵皆神  
惠也賓者有司特牲禮曰宗人曰祝曰佐食少牢禮又有司  
馬司士雍人廩人司宮宰夫之屬特牲禮有尸俎祝俎胾俎  
主婦俎佐食俎賓及長兄弟俎有司徹禮敘十二俎正俎三  
侑俎二胾俎三主婦俎一魚俎三其餘賓俎次賓俎司馬俎  
不具其數而酬酢之禮既行神惠固已徧矣餽有酌有醕亦  
酢主人佐食賓長兄弟既與獻酬之禮餽復及之者亦取有  
司中之習禮者爲之君餽徧及在廟由四人至六人八人堂  
下之俎則羣有司皆得餽焉與儀禮命餽之文異其禮不見

於他經儀禮專詳大夫士饋食之儀天子諸侯之禮猶可推類見之

鋪筵設同几爲依神也詔祝於室而出於祊此交神明之道也鄭注詔祝告事於尸也出於祊謂索祭也孔疏詔祝謂灌鬯饋孰醕尸之等祝告事於尸祊謂明日繹祭嵩齋案郊特牲直祭祝於主索祭祝於祊特牲少牢禮竝敘主人西面尸內祝在左鄭注祝釋辭於主此爲事主之禮郊特牲之云直祭卽鄭注所謂厭祭也經云鋪筵設同几鄭注以其妃配亦不特几其注司几筵云於廟同几亦明爲主筵所以謂之交神明直祭與索祭相連爲文皆在迎尸前尸入而神有所憑一以人道事之非事鬼神之道矣注以詔祝爲告事於尸大誤



疏因連瀝鬯饋食醕尸皆告事而以祊當明日之釋祭儀禮  
不詳告事之節釋祭賓尸尤不得爲索祭儀禮之文具在猶  
可一證鄭注之誤言禮者正當參互考求無徒拘守一說以

誣經也

詳見郊  
特牲

所使爲尸者於祭者子行也父北面而事之

鄭注朝事延尸於戶外是以有北面事尸之禮嵩燾案少牢  
禮司宮筵於奧室中之筵當西南隅主東面尸南面主人尸  
內西面嚮主也郊特牲云坐尸於堂用牲於庭裸獻畢迎牲  
祝延尸升祭義所謂君牽牲穆咎君是也主人於是有北面  
事尸之文尸還入室乃行朝踐注謂朝踐延尸戶外者非也  
尸飲五君洗玉爵獻卿尸飲七以瑤爵獻大夫尸飲九以散爵

獻士及羣有司皆以齒

鄭注尸飲五謂醕尸五獻也大夫士祭三獻而獻賓孔疏祭二獻裸用鬱鬯尸祭奠而不飲朝踐二獻饋食二獻及食畢主人醕尸故云尸飲五主婦醕尸賓長獻尸是尸飲七也時正九獻禮畢但初二裸不飲故云尸飲七長賓長兄弟更爲加爵尸又飲二是竝前尸飲九也侯伯七獻朝踐饋食各一獻食訖醕尸但尸飲三子男五獻食訖醕尸尸飲一大夫士祭三獻而獻賓明與諸侯獻賓不同有司徹下大夫不賓尸與士同亦三獻而獻賓其上大夫別行賓尸之禮與此異嵩簋案儀禮醕尸畢乃獻祝及佐食是未醕尸以前不得獻卿及大夫疏以裸尸不飲飲尸除裸尸二獻極允而云饋食二

獻醕尸以釋注醕尸五獻之文與儀禮不合特牲禮尸入祭  
酒啐酒乃食尸三飯告飽祝侑又三飯告飽祝侑如初又三  
飯主人升酌醕尸少牢禮尸升筵食舉三飯尸又食又食又  
食又食告飽祝侑尸又食主人拜侑尸又三飯主人酌酒醕  
尸士祭九飯大夫祭十一飯卒飯醕尸皆在主人一獻之中  
主婦醕尸儀禮無文疑朝踐饋食賓皆有獻故醕尸爲飲五  
案九獻皆正獻醕尸不與九獻之數經儀禮三獻皆有獻祝  
云尸飲不云獻尸注謂醕尸五獻亦誤獻佐食之文士大夫之祭有司以祝爲尊經云獻卿蓋大宗  
伯之屬大祭祀涖玉鬯奉玉盞有事於饋獻者少牢特牲之  
醕尸獻祝卽其例也儀禮三獻作止爵於是有兄弟之加爵  
有眾賓長之加爵有嗣子之舉奠有佐食洗散之獻皆加獻

也似九獻之禮卿大夫士竝當有正獻特牲禮宿賓曰某薦  
歲事吾子將蒞之鄭注言將臨之知賓在有司中有司徹敘  
獻尸之儀云賓長設羊俎雍人授次賓疏匕舉俎司馬挹酒  
注於疏匕以授尸次賓羞羊燔敘獻侑之儀云司馬執羊俎  
以升次賓羞羊燔敘主人受尸酢之儀云長賓設羊俎次賓  
羞匕酒司馬羞羊肉酒次賓羞燔敘主婦亞獻尸之儀云次  
賓羞豕匕酒次賓羞豕燔長賓次賓與司馬司士同有事於  
祭主婦獻尸及受酢獨有次賓而已長賓不與焉其獻侑獨  
有司士此當爲卿大夫士贊獻之等士祭以一人爲賓其餘  
爲眾賓大夫祭以一人爲長賓一人爲次賓其餘爲眾賓一  
皆有司之與於祭者與此之獻卿獻大夫獻士正同一例注

家不詳其義而祭之有賓遂無有知其故者注云大夫士祭

三獻而獻賓不知饋食禮醕尸而獻祝獻佐食亦獻賓之事

也

案有司徹禮不賓尸三獻畢獻賓獻兄長之禮並同賓尸則與正祭相間爲之其儀繁而實一也疏以爲上大夫下

大夫之分並謂禮與此異似謂鄭注大夫士專據下大夫言之強生分別無當經旨

又案禮器宗廟之祭貴者獻以爵賤者獻以散以此經之文

準之君之獻卿大夫士卽用卿大夫士之獻尸者君與卿同

餽故獻卿之爵可以用君獻尸之爵特牲禮賓三獻爵止主

人獻賓似凡獻卿及大夫士亦當視其所以獻尸者爲之節

特牲禮主人獻賓賓受爵主人獻眾賓洗觶酬賓此當爲獻

卿大夫之節利洗散獻於尸酢及祝此當爲獻士之節

又案王氏述聞此言尊卑之等非言長幼之序不得云皆以

齒蓋涉下文凡羣有司皆以齒而誤衍疏謂齒同列則長者  
在先則序爵又序齒與下明尊卑之等文義相刺謬據燕禮  
大射禮獻士而及祝史小臣師既爲士舉旅遂獻庶子如獻  
士之儀獻左右正與內小臣如獻庶子之儀是羣有司亦自  
有等左傳隱公十一年不敢與諸任齒杜注齒列也孔疏人  
以年齒相次列以爵位相次羣有司各視其所職司之高下  
以爲列齒者列也與下文凡羣有司皆以齒文同而義自別  
故祭之日一獻君降立於阼階之南南鄉所命北面史由君右  
執策命之再拜稽首受書以歸而舍奠於其廟

鄭注一獻一醵尸也嵩齋崇義疏引洛誥烝烝乂惟告周公  
其後是因時祭而命之但洛誥告後始云王入太室禋祀記

則一獻後乃降立而命之其次少別以文義揆之王命作冊  
逸祝冊惟告周公其後謂告之文武廟也祝者告神之辭也  
既告而後迎尸入太室祿迎尸以後之事也王命周公後作  
冊逸誥誥周公也於篇後言之祭事畢矣曰王賓周公於時  
亦有事於廟王命周公因烝祭而告之於廟重其事也周禮  
內史命諸侯及孤卿大夫則策命之內史無職於祭祀因祭  
祀而策命內史自以其職掌之此經下云於禘發爵賜服於  
嘗出田邑發秋政發爵發政相竝爲文自當行之祭後不能  
於九獻之中行之大宗伯賜諸侯則饋小宗伯賜卿大夫則  
饋饋者賓禮也祭之日一獻謂因祭策命爲行一獻之禮凡  
祭獻卿獻大夫獻士所受命者亦當與於獻至是一獻爲加

禮也饋食醕尸祭事方殷安得遽降而策命所命者皆有事於祭安得遽受而歸凡受命必於廟歸又自釋奠於廟祭義所謂祿爵慶賞成諸宗廟是也一獻而策命爵祿非所以重祭事也凡祭醕尸一而已尤不宜以當一獻注謂一獻爲一醕尸恐未然也

凡賜爵昭爲一穆爲一昭與昭齒穆與穆齒

鄭注君賜之爵謂若酬之孔疏引賈公彥云公賜爵謂祭末旅酬無算爵時嵩燕案周禮司士及賜爵呼昭穆而進之帥其屬而割牲羞俎豆特牲禮主人獻賓薦脯醢設折俎獻眾賓薦俎設於其位辨主人洗爵獻長兄弟如賓儀洗獻兄弟如眾賓儀長兄弟及眾兄弟卽昭穆之女也司士呼昭穆而



進之割牲羞俎豆正當是時有司徹饗主人酌獻兄弟於阼  
階上徧受爵其薦胥設於其位受爵薦胥故謂之賜爵其後  
賓及眾賓長兄弟及眾兄弟交相酬曰旅酬賓子弟兄弟子  
弟又各舉觶於其長曰無算爵鄉飲酒禮所謂一人舉觶而  
行旅酬二人舉觶而行無算爵是也其禮主人不與安得云  
賜爵也鄭注謂若酬之擬議之辭疏遂以當旅酬者誤也  
燿者甲吏之賤者也

鄭注燿周禮作韠謂韠磔皮革之官也嵩養案韠人爲皋陶  
蓋治鼓者所主皮革猶樂吏之屬而不得爲甲吏說文燿光  
也周禮眡禮掌十燿之法鄭司農云日光烝也凡雲日烝有  
光者謂之燿張昭唐韻正燿從火其用爲熏燎之屬則燿者

司火之吏也司燿掌行火凡祭祀則祭燿司燿屬大司馬甲士之屬也燕禮大射禮甸人執大燭於庭執燭之甸人亦甲士也竝當在燿者之列鄭注誤

與舊嗜欲作率慶士

鄭注率循也慶善也士之言事也言文叔興起先祖之舊德以循其善嵩齋案洪氏讀書叢錄舊當爲觀字之訛說文觀古文作𠄎與舊字形相近其言甚允觀者循省之意循省其心志之所注振發興起以是表率在廷之卿士相與趨事赴功慶卿字通尙書太傅相和而歌卿雲鄭注卿當爲慶古今樂錄慶雲之瑞因以作歌戰國策樂乘以五萬遇慶秦於代史記作卿秦卿慶一聲之轉慶士卽卿士也此孔悝所誤其

父孔文子之鼎銘銘辭分兩截續祖服者美成叔之繼莊叔  
續考服者勉孔惲之繼孔文子之業也一銘而表揚其祖考  
三世之賢又並己名傳焉爲銘辭之最盛者於文叔無興起  
舊德之意洪氏之說爲允

升歌清廟下而管象朱干玉戚以舞大武八佾以舞大夏

鄭注管象吹管而舞武象之樂也嵩齋案鄉飲酒禮燕禮歌  
鹿鳴四牡皇皇者華笙入堂下樂南陔白華華黍大射禮歌  
鹿鳴管新宮樂有升歌有間歌有合樂升歌下管序樂之始  
事義疏云升歌與下管對大武與大夏對象有但吹以管者  
此下管象是也有舞以箛者左傳象箛南箛是也象舞以羽  
箛是文舞武舞以干戚是武舞鄭合象武爲一誤其言至允

據大司樂六樂有三節曰奏曰歌曰舞而大胥云以六樂之  
會正舞位是凡舞必合歌與奏以爲之節蔡邕月令章句云  
樂聲曰歌樂容曰舞二者竝舉詩小序維清奏象舞也管象  
卽維清之什文舞武舞竝用之而下管自與升歌相應郊特  
牲固曰歌者在上匏竹在下合舞則竝歌與奏展而序之仲  
尼燕居入門縣興升堂樂闋下管象舞夏籥序興相連爲文  
非謂象武之舞專與下管相應也

禮記質疑卷二十五終

禮記質疑卷二十六

思賢講舍

湘陰郭嵩燾伯琛著

經解

孔子曰入其國其教可知也其爲人也溫柔敦厚詩教也疏通  
知遠書教也廣博易良樂教也絮靜精微易教也恭儉莊敬禮  
教也屬辭比事春秋教也

孔疏入國而教可知者言人君以六經之道各隨其民教之  
嵩燾案疏意以下六經之教竝爲孔子之言非也六經皆聖  
人手定春秋則聖人筆削之書也記禮者廣明六經之教而  
引孔子入其國其教可知之言以證人之成德必原本教化  
而六經之教之感人其旨趣亦各有所極也自其爲人也以

下皆記者之辭聖人之意自謂入國而覘其人民風尚之貞  
淫以知其教之得失六經之旨涵濡於人身與教之涵濡於  
一國者同也舊注竝以此節爲聖人之言劉氏彝至謂古者  
編年之史皆曰春秋仲尼未作已列爲經失之遠矣

故詩之失愚書之失誣樂之失奢易之失賊禮之失煩春秋之  
失亂

鄭注易精微愛惡相攻遠近相取則不能容人近於傷害春  
秋習戰爭之事近亂嵩燕案六經無失學者習而傳焉而失  
其本旨所以爲失也記禮者殆有見於周秦閒言六經者各  
守其師說展轉相傳源遠而流益岐如詩之有齊魯韓易之  
有費孟春秋之有公穀左各分門徑易之失爲焦贛京房及

凡爻辰卦氣之說以小術害道是之謂賊莊子云春秋經世  
聖人存而不論三傳受經孔子之徒皆各發明義例指爲有  
所刺譏褒貶而公羊氏至賢蔡仲之行權大衛輒之拒父是  
春秋方數傳已有因之獎亂者記禮者有憂之鄭據以爲經  
之失非也

行步則有環佩之聲

鄭注環佩環佩玉也環取其無窮止玉則比德焉孔子佩  
象環五寸人君之環其制未聞嵩齋案毛詩鄭風傳雜佩珩  
璜琚珌衝牙之類大戴記保傅篇下車以佩玉爲度上有雙  
衡下有雙璜衝牙玼珠以納其閒琚珌以雜之玉藻佩玉有  
衝牙珩珌者謂其與左右璜衝觸而有聲是佩玉之聲璜爲



之也說文璜半璧也又云璧肉好若一謂之環兩璜相向皆  
虛其內以受衝牙正如環然凡云環佩者皆主璜言之取其  
合而有聲者以爲名也注據佩環爲言陸氏佃云環佩上玉  
佩上玉卽珩以繫佩者不宜有聲恐誤

除去天地之害謂之義

孔疏天地之害謂凡水旱疾疫之屬及凡惡事害人者是也  
嵩巖案水旱疾疫有祈禳而無除去之義義者所以濟仁之  
窮也若禹之驅龍蛇周公之兼夷狄驅猛獸及周禮之掌戮  
禁暴以除人害蜡氏雍氏以除事害冥氏穴氏以除猛獸之  
害寔氏蜺族氏庭氏以除鳥害庶氏翦氏以除蠱害赤友氏  
蜎氏壺涿氏以除蟲蛆之害柞氏薙氏以除草木之害皆是

也

夫禮禁亂之所由生猶坊止水之所自來也故以舊坊爲無所用而壞之者必有水敗以舊禮爲無所用而去之者必有亂患孔疏禮本坊亂若謂舊禮無用而壞去之必有亂患當棄案水所自來而爲之防防其源也至於泛濫有不勝其防矣舊防舊時相沿之坊舊禮舊時相沿之禮乍而觀之其勢若遠其文若煩而聖人之精意存焉或苦其煩而相與日趨於苟簡故禮之廢非能一朝而廢之也其所由來漸也舊時相沿之禮一有變而遷焉久而遂盡失其故昏姻喪祭未嘗一日廢於天下而禮之失其舊者多矣先王不易之禮所謂大經大法垂諸天地之間者亦未能有決然去之者也

禮記質疑卷二十六終

禮記質疑卷二十七

思賢講舍

湘陰郭嵩燾伯琛著

袁公問

然後以其所能教百姓不廢其會節有成事然後治其雕鏤文章黼黻以嗣其順之

鄭注上事行於民有成功乃後續治以文飾以爲尊卑之差孔疏會猶期也期節謂天地君臣男女之期節嵩燾案戴記之言然後皆自爲發端語無連上爲文者此節言然後凡三而以有成事三字屬之第二段以其順之三字屬之第三段似戴記無此文法王氏章句以節有成事爲一句以嗣其順之爲一句於文義較長不廢其會會猶計也如太宰之受其

會鄉大夫之會政州長之會民縣正之會事言既以身教而不廢致民讀法之典事事示之以成法節有成事如鄉師之令作秩敘黨正之以歲時涖校比遂大夫之戒其功事里宰之行其秩敘一依成事爲之準節者所以制爲之極也疏訓期節誤會民而授以成法而質立矣於是制爲衣服器用之等以文之人情之用之必飾以文也亦天地自然之序也聖人因其勢而利導之而必使厚植其質以立之幹所以爲順也爲其質之可以爲嗣也既軌於順然後因喪祭之節以達其追遠之忱而致其報本之義蓋推原禮之所從起所以納民軌物之中者其本厚也注謂治文飾以爲尊卑之差誤國民是盡午其眾以伐有道

鄭注固猶故也午其眾逆其族類也孔疏守道者被害是伐有道也嵩齋案陳氏集說固如固獲之固言取之力也固民是盡承上好實無厭言之謂殫民財也與上與民同利正反午其眾以伐有道承上淫德不倦言之謂窮民力也與上以嗣其順之正反下文求得當欲又總結此兩義言貪其所得而不計民生之盈虛恣其所欲爲而不顧人情之順逆也內以治宗廟之禮足以配天地之神明出以治直言之禮足以立上下之敬物恥足以振之國恥足以興之

鄭注直猶正也正言謂出政教也嵩齋案婦人無外事此言昏禮而及政教於義無取詳玩此節文義言夫婦之配合配其德而已而家國之興衰繫焉故昏禮爲重治宗廟之禮士

昏記所謂受諸禰廟三月然後祭行是也始事而立於阼立於東房正內外之治以配陰陽治直言之禮士昏記所謂辭無不腆無辱是也昏辭曰敢以禮告鄭注賓不稱幣不善主人不謝來辱是之謂直言之禮物恥國恥則同憂樂申警戒邶風詩所謂何有何無黽勉求之卽其義也左傳哀公二十四年立公子荆之母爲夫人國人始惡之二十七年公患三桓之侈欲以越去之遂遜於越孔子自衛反魯在哀公之十一年殆有見乎其微矣

三者百姓之象也身以及身子以及子妃以及妃君行此三者則愷乎天下矣大王之道也

鄭注太王居闕爲狄所滅乃曰土地所以養人也君子不以

其所養害所養乃去之岐是言百姓之身猶吾身也百姓之妻子猶吾妻子也嵩齋案經引大王之道以證所以敬妻子之義鄭據大王爲說非也身與妻與子三者百姓所同王道卽基於是各治其身家而天下治矣及者敬之推也大雅爰及姜女聿來胥宇敬其妻子以及人而從者如歸市大王之道正如此此義益本之孟子

君子言不過辭動不過則百姓不命而敬恭

鄭注民者化君者也嵩齋案此言敬身之實身之用言動而已君子所貴乎道者三曰動容貌曰正顏色曰出辭氣曾子省身之功畢具於此言動者本諸身以與天下相接莫之能外者也舍言動無以爲敬身之資身敬則百姓莫敢不敬矣



化民之義祇帶說

不過乎物

鄭注物事也孔疏成身之道但萬事得中不有過誤嵩憲案物者何言動而已矣身之所以成非能求加於言動之外也言與動取具於一身而各求其節事事求止乎其節五官百體不窮於用而祇以自效於其身故曰惟聖人然後能踐形取具於言動而無餘矣

貴其不已如日月東西相從而不已也是天道也不閉其久是天道也無爲而物成是天道也已成而明是天道也

鄭注日月相從君臣相朝會也不閉其久通其政教不可以倦無爲而成使民不可以煩也已成而明昭察有功嵩憲案

經以一如字貫下四項原兼人道所以法天言之然一歸重君身不及臣民易曰君子以自彊不息不息所以能久一有閉塞其用已窮不閉所謂久則徵也此不息之功也無爲者誠也誠則成己成物仁知竝立所謂誠則明也此立誠之體也誠以爲體不息以爲用斯所以爲天道乎

仁人不過乎物孝子不過乎物是故仁人之事親也如事天事天如事親是故孝子成身

鄭注事親事天孝敬同也嵩齋案全章以敬愛二字相綰合禮始於謹夫婦愛敬由是行焉而因推本於敬身以成親法天而要歸於成身成親之謂孝法天之謂仁仁孝之實愛敬而已矣極愛敬之心因物以示之則而所以事天事親者取

具於身而終亦無能溢乎其量故曰存其心養其性所以事天也此成身之義也

禮記質疑卷二十八

思賢講全

湘陰郭嵩燾伯琛著

仲尼燕居

給饗慈仁

鄭注巧言足恭之人似慈仁特言是者感子貢也子貢辨近於給嵩燾案何晏論語集解引孔氏云口給口辭捷給此云給知非以辭辨取給於口也而恭之與口給亦不相爲類蓋敬恭勇三者德也其不中禮據所行之麗於事者言之敬以心言恭以容言勇以氣言敬與勇內涵之心而容發之於外周旋進退亦近於禮云給者取給儀容之末也禮之有節所以達其情而制其義者也取給於儀容而愛敬之生於其心

亦微矣野與逆之失易見爲其率性然也給則外似優於禮而一出之以矯飾如是而悻悻纏綿行於交接之頃者忽不自知其銷靡以盡也故曰給奪慈仁

敢問禮也者領惡而全好者與

鄭注領猶治也好善也嵩齋案此惡非邪惡也行道而有過與不及則亦惡矣過與不及由其行道而見之者也領之使出於中則惟禮之準乎天理人情之至者爲之節文馴習自然以全其性所謂領者懸禮以爲表率之意樂記領父子君臣之節亦是此義

明乎郊社之義嘗禘之禮治國其如指諸掌而已乎

鄭注郊社嘗禘尊卑之事有治國之象焉嵩齋案此就上文

五項中專提郊社嘗禘二者言之蓋報本反始之義仁孝愛敬之施幽明禮樂之教可於此二者盡其義人心之愛敬因事而生聖人制爲禮以達之故凡禮之行皆本於仁郊社嘗禘反諸人所自生以明報本之意而仁溥諸天下焉治國者使之反本歸厚以鶩於仁而已故此二者可以盡其義注於此二節文義多未盡

吾語女禮猶有九焉大饗有四焉苟知此矣雖在畎畝之中事之聖人已

鄭注四者謂金再作升歌清廟下管象也縣興金作也金再作者獻主君又作也振羽及雍金作示情也嵩燾案義疏據鄭注大饗有四而疏引盧氏植說王氏肅說竝謂大饗有九

而言盧鄭全異王前四事與鄭同後五事與鄭異爲不達鄭意至爲精確經明言大饗有四而以所謂九者併入大饗中又於經文所敘十二事各以意爲增損其失經義遠矣鄭於此析金作爲二事而於縣興外添入竝獻主君之金作又在本經外於四者之義終未分明義疏云大饗有四前言食饗以仁賓客觀之因可知仁而示情示德示事又有其三合前知仁爲四自較注義爲明曉細玩經旨所謂示情示德示事卽據前用樂爲言而所謂知仁者合言之又於此分言之爲示情示德示事要其實則一金作而已不足以盡大饗之義也吳氏澄云大饗之禮其節有四初迎賓一也次獻賓二也次樂賓三也次送賓四也於其間分升堂一節爲獻賓而合

升歌下管爲樂實又與經言示情示德示事之意悟以文義求之示情也示德也示事也君子由之以知仁饗禮之始事也客出以雍徹以振羽行步之節鸞和之音備物也君子由之以觀禮饗禮之終事也凡分二段順敘後云示情示德示事申明前一段中實具此三義文法至爲完密以禮樂相示而精義自存乎其中經云知此者聖人惟知禮中之義焉耳又案經言猶有九焉大饗有四焉鄭注不詳九者之爲何事至吳氏澄始據上文郊社嘗禘饋奠射鄉食饗以爲是五者卽諸禮之中總其凡而言大饗之四就一禮之中分其目而言竊疑上文通言食饗已賅大饗言之復於大饗中約舉四端以與五者相配爲九未免輕重失倫周禮或言食饗或言



大饗大抵朝會饗諸侯之文所述皆王禮也其他饗禮不具

見春秋傳舉其禮甚繁約言之實有四焉一天子饗諸侯一

諸侯相饗

案莊二十一年鄭伯饗士於闕西辟樂備是為諸侯饗天子之禮昭元年秦后子饗晉侯定十三年

衛公叔文子饗靈公是為大夫饗諸侯之禮據郊特牲天子無客禮莫敢為主焉天子諸侯君道也饗禮備賓主之義而

上及天子諸侯春秋之變禮也一天子諸侯饗其臣及異國之為聘使者一

諸侯饗王臣

案天子饗諸侯大夫如僖十二年王以上卿之禮饗管仲宣十六年晉侯使士會平王室定王

饗之諸侯饗王臣如僖三十年周公問來聘饗有昌歆白黑形鹽凡備禮為饗不備禮為燕是以天子諸侯用饗禮者皆

可名大饗諸侯之自饗其臣不當云大饗然如襄二十六年鄭伯

饗子展賜之先路三命之服先八邑賜子產次路再命之服

先六邑因饗而賜命與邑皆大饗也承上食饗以仁賓客言

饗禮中又有所謂大饗者四焉以極論其禮之盛而舉兩君

相見所以備禮樂之用者以見義上達天子下及卿大夫其事同其儀文度數之各異者固可以類推也上言食饗如公食大夫禮及養老之禮之兼燕食饗者一以賓禮處之其義廣矣而大饗之有是四者實各不相蒙列國邦交之義歲時朝聘用此蓋尤繁焉至於春秋而僭替繁減有失其紀者矣此亦聖人精義之學也

不能詩於禮繆不能樂於禮素薄於德於禮虛

鄭注王制曰樂正崇四術立四教順先王詩書禮樂以造士春秋教以禮樂冬夏教以詩書王太子王子羣后之太子卿大夫元士之適子國之俊選皆造焉則古之人皆知諸侯之禮樂嵩齋案鄭氏意以此節上承大饗之禮故牽合言之先

王治天下禮而已矣而成均敎國子之濫掌之大司樂玉藻  
行以采齊趨以肆夏進退升降一以樂文之樂者禮之所由  
行也自唐虞典樂始於詩詩以歌永之而有聲聲以律和之  
而有倫太司樂敎六詩而以六律爲之音以六德爲之本鄭  
引王制敎士之法是也君子之成德亦必有其質焉有其文  
焉而後動容周旋爲能中乎禮詩言志者也昧於貞淫正變  
之旨而不能詩故曰繆樂彰德者也關於文采節奏之飾而  
不能樂故曰素

萬物服體

鄭注服體體服也謂萬物之符長皆來爲瑞應也嵩燾案鄭  
意據虞書鳳凰來儀百獸率舞爲禮樂之應疑萬物服體祇

是萬物皆得其所意通人物言之服體如衣服之附體親而  
安之順而從之施之而有序被之而有章也尙書山川鬼神  
及鳥獸魚鼈咸若亦是萬物服體意

禮記質疑卷二十八終

禮記質疑卷二十九

思賢講舍

湘陰郭嵩燾伯琛著

孔子閒居

四方有敗必先知之

孔疏觀微知著豫知禍害嵩燾案此卽論語父母惟其疾之憂意先知之所謂思患而預防之者也應氏鏞云父母之心惻怛懇至四方萬里微有禍敗必先知之蓋愛其民者切慮其事者周故不善之幾微萌芽稍觸於吾身則已先知焉最得其旨五至三無內蘊之心不言而周於民物而有以察乎其微孟子文王視民如傷自是窺見本原語知此則四方所以致敗之由亦思過半矣

志之所至詩亦至焉詩之所至禮亦至焉禮之所至樂亦至焉樂之所至哀亦至焉哀樂相生

鄭注凡言至者至於民也志謂恩意也言君恩意至於民則其詩亦至也詩謂好惡之情也嵩齋案志者仁義之所從生盡己之事也由是正好惡以理人之性情而詩至由是詳節文以端人之趨向而禮至二者由己及人之事也由是易俗移風太和洋溢睹萬物之遂生而樂至由是憂盛危明至誠惻怛惟懼一夫之不獲而哀至二者治人反己之事也哀樂相生以是哀卽以是樂視己之於人訢合無閒纏綿固結窮極幽微而自不容已故曰至

凡民有喪匍匐救之無服之喪也

鄭注言君於民有喪有以矜恤之則民倣之嵩燾案三無者君子之心之所以內自慙無責民效之意言禮言樂而及無服之喪禮樂之原皆寓於政教之中而行之必以至誠惻怛極天下四海之眾疾病天札皆其裁成輔相之宜之有未至文王視民如傷誠傷之也故治民以能用哀爲本無服之喪由其仁心流動充滿自然以生其哀者也

無服之喪以畜萬邦

鄭注畜孝也使萬邦之民競爲孝也嵩燾案鄭據祭統孝者畜也以求合喪字之義說文田部畜田畜也猶言力田之蓄積也草部蓄積也畜本訓蓄積易容民畜眾周禮稻人以漚畜水又通爲容畜之義周禮庖人六畜六獸鄭注始養曰畜



坊記以畜寡人又通爲畜養之義孟子匹夫匹婦有不與被堯舜之澤者若已推而納之溝中無服之喪一念存於心以懷保萬邦無難矣注意似涉迂曲

無聲之樂氣志既起無體之禮施及四海無服之喪施于孫子

鄭注起猶行也嵩燾案起如孟子百世之下聞者莫不興起

之起首言其蘊之深

氣志不違

次言其發之盛

氣志既得

次言其感孚

之遠

氣志既從

次言其光輝

日聞四方

終言其興起天下後世兩施字

與前施及四國之施語同而義微別玉篇施張也廣韻施設也此施及四國之義詩毛傳施于中谷施移也鄭箋施于孫子施延也此施字之義

者欲將至有開必先天降時雨山川出雲

鄭注耆欲將至謂其王天下之期將至也神有以開之必先爲之生賢知之輔佐嵩齋案經三引詩首湯言其德之盛次文武言其化之神次三代太王言其名之遠崧高詩以證文武之德不顯亦臨無教亦保若息息與天通而默受其佑助未宜援生甫及申之辭專據賢佐爲言耆欲將至有開必先言王者神明其德以前民用凡利病之原察及隱微因機而利導之如天地之生物皆有以遂其性而使之無不達者也有清明之德然後生民之耆欲皆能化而裁之神而明之以自任其先覺先知之責所以開耆欲之先清明如神之志氣爲之也

禮記質疑卷二十九終